

LA USC DI LADINS – VENERDI' 21 GIUGNO 2019

SCOLA E FORMAZION

Antropolad: la piccola Università ladina te Fascia va inant

Dò l'prim cors de 2 egn, con passa 60 scric ite, chest ution pearà via n' auter cors con mudamenc tel recognosciment di credic. L'è avert la iscrizions a chest percors de gran valuta

L'è temp de bilanz e de riflessions per Antropolad, per peèr via denef a na vida più percacenta.

L'percors de auta formazion endrezà da la Scola Ladina de Fascia en colaborazion con la Universitàs de Busan e de Trent e col sostegn de la PAT l'era tacà ite te l'an de scola 2017/18 per sporfier na formazion più fona ti ciampes de la linguistica, de la lettradura e cultura ladina e de l'antropologia alpina, soradut per i dozenc, ma ence per studenc universitàs e operadores culturai del teritorie e per duc chi che vel saer zeche de più en cont de noscia cultura.

Da egn la comunanza ladina de Fascia spetèa la costituzion de n sistem permanent de auta formazion per ge permetter ai dozenc en servije o che i se endreza a chesta profesion, de tor sù la competenzes che serf per ensegnèr te la Scola de Fascia, che cogn garantir n ensegnament del lengaz ladin percacent e efizient, te n chèder de educazion plurilingue e averta a l'Europa.

Ades Antropolad fèsc pèrt del Pian anuèl de l'ativitèdes de formazion de la Scola Ladina aldò de na Convenzion aproèda dal Consei

de la Scola, e l'è l'resultat de n lonch lurier fat en sinergia anter la Scola e la istituzions del teritorie desche l'Istitut cultural ladin "majon di fascegn" e l'Comun general de Fascia, ensema a la Provincia de Trent e la Universitàs de Busan e de Trent per sviluppèr e renforzer la competenzes profesionèles di dozenc.

Se à serà sù l'prim cors

Chest'aisciuda se à serà sù l'prim percors de 2 egn, fenì a na vida positiva da passa 60 dozenc de la scola de Fascia. Struturà con lezions de 4 ores per talian o per ladin, l'à tout dant anter l'auter i argomenc de linguistica ladina con l'professor Paul Videsott, Degan de la Facoltà de Scienze de la formazion de l'Università ladia de Busan e diretor de Antropolad. Apede l'è stat ence lezions de linguistica romanza con l'professor Giampaolo Salvi de l'Università de Trent, lettradura e analisa di tesc con l'diretor de l'Istitut Ladìn de Fascia Fabio Chiocchetti, antropologia con i dozenc Ester Gallo e Cesare Poppi e didatica del ladìn con Ruth Videsott.

L'èjam de fin de cors ge à dat l met a tropes partezipanc de fèr na tesina sun desvalives argomenc enteressanc leà a la linguistica, a la lettradura o a l'antropologia ladina, che se podarà lejer sul numer de Mondo Ladino che vegnarà fora chest ution, per slarièr fora cognoscenzes, competenzes e curiositèdes anter dozenc e operadores culturai ladins.

La valutazion di credic

Ampò te anter l bilanz de chisc prumes doi egn no mencia ence vèlch criticità e problem. A risièr de meter stram te strèda a la gran oportunità per Fascia de poder aer n percors prestigios de auta formazion, na sort de piccola Università ladina te Fascia, l'è stat vèlch empaz istituzionèl cauà fosc dal vez massa en doura anchecondi de vardèr de se meter la piuma sul ciapel piuttosto che de vardèr che i obietives vegne arjone.

Apede chest l'è vèlch costion che revèrda la normes che ge dae stabilità a l'auta formazion e i criteries de recognosciment de chest percors e di credic per la prezedenza di dozenc.

Chest'aisciuda, a la fin del prim cors, l'OLFED de la Scola Ladina de Fascia à enjignà n costionèr per tor sù la opinions de chi che à jà fat l cors Antropolad e la manifestazions de enteress de chi che no l'à fat, per poder se endrezèr a na vida miora e più percacenta per la comunanza ladina.

Al scomenz l'era stat pervedù l recognosciment del percors de auta formazion desche titol de prezedenza con amancol 9 corsc passè positivamenter sui 12 metui a jitr. L'ensegnanc à domanà de poder aer schiarimenc su la valuta di corsc de Antropolad desche titol per l'ensegnament, ence en raport con l'atestat de cognoscenza del lengaz ladìn de livel C1 e con la situazion desferentes di dozenc a livel de abilitazion.

Per resolver chisc problemes l'è stat domanà più outes e te desvaliva sentes istituzionèles che l'auta formazion ladina posse aer n chèder normatif chièr e stabol per poder doventèr titol de abilitazion per i dozenc te la Scola de Fascia. Endèna l secondo cors sarà sparti a na vida che se posse tor pèrt ence demò a vèlch un di corsc: per ogneun l'è

stat pervedù l numer de credic che vegn concostè.

L'nef cors

L cors per i egn academics 2019/20 e 2020/21 pearà via se l'è amancol 5 scric ite e l'vegnerà fat te la senta de la Scola ladina de Fascia. En dut l'è 12 corsc, la lezions tacarà ai 4 de otober e les sarà te bloches de 4 ores per 5 lezions, de vender domesdi e de sabeda da doman.

Se taca con l cors Storia sociale della Comunità ladina, dapò sarà Antropologia alpina e Storia de la Comunità de Fascia de november, Antropologia e cultura de l'area ladina e alpina de firè, Storia de la lettradura ladina de mèrz, Cultura materiale e arte popolare de oril. L secondo an se jirà inant con Linguistica romanza, Folklore e narrativa popolare, Didattica del ladino e glottodidattica, Linguistica ladina, Poesia e cianties populères ladines, Lessicologia e toponomastica II. En dut i corsc sporc 18 credic CFU con na frequenza de amancol 80% de la lezions e l'èjam finèl.

Per se scriver ite vegn domanà l diplom de matura e na cognoscenza del lengaz ladìn de livel B2. La preiscrizion è jà averta e la jirà inant enscin ai 11 de messèl; dai 29 de messèl ai 8 de aost sarà la imatricolazion.

Duta la informazions sul link: <https://www.unibz.it/it/faculties/education/antropolad/>

Chisc corsc podessa vegnir recognosciui no demò te la Scola ma ence te etres setores de lurier public, ampò no i raprejeta demò n "credit" da desfrutèr per l post de lurier ma ence na perferida ezelenta de educazion permanenta per duc chi che cree tel valor de la competenza e de la cultura e formazion personala, tant ensegnanc che operadores culturai che laora te l'informazion o te la comunicazion duran l lengaz ladìn.

Lucia Gross



Na lezion del prim percors de Antropolad con l diretor del cors, professor Paul Videsott.



I studenc à abù en don desche material didatich ence l nef liber su la lettradura de Fascia.